

KUMPUAN
KHAWTLANG NUN
SIAMTHAT

YMA

AW



CHANMARI WEST BRANCH YMA CHANCHINBU KAR TIN CHHUAK. VOL. XXIII. ISSUE NO.40 30th Oct. 2011

66th YMA GENERAL CONFERENCE TIAK

Chanmari West October 30: YMA General Conference vawi 66-na Kolasib , Diakkawn, Pandal a neih chu Ni 27.10.2011(Ninga) khan neih zawh a ni a, Khualian atan Home Minister Pu R.Lalzirliana hman a ni. Kum 2012 General Conference chu Kawrtehawveng-ah neih a ni ang.

Tun tum General Conference ah hian Ni 26.10.2011 Dar 10:00 tlenga zan riak tura palai inziaklут mi 3247 an awm a, heng bakah hian langa kal mi nemawzat an awm bawk a ni.

Ni 26.10.2011 (Nilaini) khan Pu Lalchungnunga President kaihruaina in Rorel inkawm neih a ni a, he rorel inkawm ah hian palai 1511 an kal a, kum 2011-2012 budget atan Rs 80,36,588/- pawm a ni. Gen. Conference ah hian kum 2012 kumpuan atan '**Ram leh Hnam Humhalh**' tih chu pawm ani bawk. He rorel inkawm ah hian Agenda chi hrang hrang YMA khawih 4 leh Sawkar khawi 5 te chu lungrial taka pawm a ni.

He General Conference neih zawh tak ah hian kum 2011-2013 atana hruaitu tur thlanna neih a ni a, inthlanna ah hian vote nei thei mi 5159 ah mi 2640 in vote an thlak a, hruaitu a thlan thar te leh an vote hmuh dan chu:-

President	- T. Sangkunga	(Vote 1404/2640 - 53.19%)
Vice President	- Lalbiakzuala	(Vote 2087/2532 - 82.43%)
Gen. Secretary	- Vanlaluata	(Vote 2006/2305 - 87.03%)
Asst. Secretary	- R.L. Rindika	(Vote 710/2310 - 30.74%)
Treasurer	- R. Lalngheta	(Vote 960/2141 - 44.84%)
Fin. Secretary	- J. Lalsailova	(Vote 887/1680 - 52.80%)

YMA General Conference ah hian lawmman chi hrang hrang sem a ni bawk a, chung lawmman leh a la tu te chu:-

YMA Branch Chanchinbu tha :- Maryma (Ramhlun 'N' Branch YMA)

YMA Chanchinbu (CYMA la tam :-

Aizawl City :- Bawngkawn Branch - 417copies.

Aizawl pawn :- Kahrawt Branch, Champhai - 200copies.

Member atabfa teh (%) a la tam :- Bukpui Branch, Serchhip - 38copies.

Kumpuan bawhzui tha :-

Branch :- Edenthal Branch, Aizawl.

Group :- Khawzawl Group.



CYMA OB 2011-2013

Pic (L-R) J.Lalsailova (Fin.Secy.), R.Lalngheta (Trea.), R.L.Rindika (Asst.Secy.), Vanlaluata (Gen.Secy.), Lalbiakzuala (V.Pre.) & T.Sangkunga (Pre.)

Published and Edited by Chanmari West Branch YMA. 950 Copies

Branch News

Tunkar lo awm tur Ni 1.11.2011(Thawhleh) zan hian Branch committee neih a ni ang.

YMA Gen.Conference ah kan branch atangin palai 18 an kal.

Conference kal nana lirthei thawhtu zawng zawng chungah Branch YMA chuan lawmthu a sawi takzet a ni.

General Conference tlenglut tanpuinan Rs 1,000/- pek a ni.

Ni 26.10.2011 (Wed) Zan Vantlang inkawm ah kan Branch hruaitu leh CYMA CEC member ni bawk Ni. Lalramengzami kaihruaina hnuiah YMATHUTHLUNG (Point 10) sawi rual a ni.

SUNNA

Pu Robert Ramsangliana Kum 37, Tuithiang Branch YMA President chu ni 23.10.2011 (Sunday) Chhun dar 12:00 khan Thluaka thisen zam chat avangin Newlife Hospital-ah a boral a, Pu Robert Ramsangliana hi Tuithiang Branch YMA-ah 1999 - Asst. Secretary, 2000-2006 - Secretary, 2007-2008 - Vice President leh 2009 atanga a thihni tleng hian President hna hi a chelh a ni. Central YMA-ah Cultural Sub-Committee-ah kum 4 leh Disaster Management Sub-Committee-ah kum 2 a awm tawh bawk. Ni 26.10.2011 (Monday) khan vuiliam a ni a, a kalsan tak a chhungte Chanmari West Branch YMA chuan a tuarpui takzet a ni.



TUNKAR CHANGVAWN

Pathian Lehkhaa thu hril lawk reng reng hi mahniin hrilhfiah tur a ni lo ti hre hmasa phawt ula. Thu hril lawk reng reng hi mihring thua chhuak a ni ngai si lo va, miten Thlarau Thianghlim tirthin Pathian hnen ata an sawi zawk thin a ni.

II Petera 1:20-21

Editorial Board
Editor

RK.Rozidinga
9436142304

Joint Editor :

RK. Malsawmkima
9862578441

News Editor

Tv. Thangkhuma
9862303135

Pu Vanlalhluta
9862366308

Tv. Vanlalfawna
9856301975

Cir.Manager

Johny Lalthanpuia
9612359161

Jacob Lalrinsanga
9612319779

Production Manager

R.Lalhmachhuana
9436151817

Branch Office Bearer
President

T.Ngurkhuma
9436190843

Vice President

R.Lalhmachhuana
9436151817

Secretary

RL.Thanhnuna
9436152760

Asst. Secretary

K.Darthantluanga
9436196071

Treasurer

C.Lalzarliana
9436142049

Fin.Secretary

Lalthuamluua
9612216649

Advisers

Pi Zamanthangi
Pu Vanlalsawma
Pu Rothuama
Pu Lalbiakthanga
Khiangte

Nang erawh chu engkimah fimkhur la, hrehawm tuar la, Chanchin Tha hriltu lam hna thawk la, i rawngbawlna kha hlen rawh. II Tim 4:5

Editorial :

'YMA General Conference Palai' YMA General Conference chu harsatna leh buaina awm lovin neih zawk a lo ni leh ta reng mai a, he conference ah hian keini veng atang pawhin mi 18 lai mai kan thawkthla ve chu a ni a. Keini aia Branch te Bus nena thawkchhuak han hmuh chuan duh khawploh na a lian duh hle mai. Engpawhnise, kan tul tlan tawh em vang a ni turah ngai ila, chutihrual chuan Presbyterian kohhran in hnamdang khawmpui a thlen buailai alo ni vei nen. A lehpek ah chuan inhlumchhuah khawp thawkchhuah i tum ve ngei tawh ang u.

Article :
MUSIC leh Hringnun

- L.S. Pachuau V- Section

Music han tih hian, Mizo tawng chuan rimawi emaw, awmze neia ri siam, tihna a ni deuh mai a. Mahse, 'music' (rimawi) chu a ngaithlatu bengah a innghat in ka hria. Entirnan, zanlaia naute tap ri chu thenawmte tan chuan bengchheng a ni thei a. Mahse, a hmangaihtu, a bikin a nu leh pa te tan chuan rimawi a ni thei bawk a ni. Tin, music hi hla leh a remna (instrument) hmanga teh deuh ber a ni a. A awmzia, a hlutna, a thil tihtiehna leh a tobul chhui lo hian thenkhat chuan kan sa liamin kan tum (play) liam ve mai mai te hi a ang deuh thin. Tin, music hian mihring nun a tibuai thei hle bawk a. Abikin 'Satanic music' kan tih hian a diklo lamah mihring nun a kaihruai thei bik lehzual a ni. Mahse a tangkaina leh a thatna lam a tam zawk avangin a thatlohma lam chu sawi vak ta lo ila. (Music tiin dah zel tawh mai ang)

Music lo chhuahna bulpui ber hi chiangkuang taka han sawi fak tur a awm lemlo a. Keini, Kristiante chuan Pathian siam a ni tih ah hian kan innghat mai a. Mahse, mihringte hian engtik atangin nge kan hriatchhuah/ hmuhchhuah a, engtik hunlai atangin nge kan hman tan tih erawh inhnialna leh ngaihdan hrang hrang a tam mai. Kum 50,000 vel kalta a Africa rama lo chhuak tanin vawiin thlenga kaihleh leh tihdanglam chhoh zel nita a sawi an awm a. Drums (a vuaka vuak chi) hi music lo chhuahna hnarkaitu pakhat ni a ngaih theih a ni bawk. Themthiamna (Art) sang zawk atanga thlira music tobul sawi chhuaku hmasa bertu chu, Dire Straits hla, 'Money for nothing' tiha, "Banging on the bongos like a chimpanzee," tiha a ni. Hei hi zawng chikatin Bongo (khuangte chikhat) a vuak sawina mai a ni a. Mahse, ngaihtuah chian chuan a ril angreng khawp mai. Tin, China rama phenglawng chikhat, saruh atanga siam, kum 9,000 vel kalta a mi kha hmuhchhuah a ni a. Tin, hetiang ang tho, kum 35,000 vel kalta a, Mammoth, sai chi khat ruh atanga siam, tunlai 4 note scale - do, re, mi, fa-, ri ang ti ri chhuak thei hmuhchhuah a ni bawk. Indian music pawh hi, Second Millennium BC, Vedic Period hunlai atanga hmuhchhuah a ni a. Tichuan, chuan 'Raga leh Tala' (hunbi neia vuakkah dan) tih hming chawin awmze nei zawka siam chhoh zel a ni ta a ni. Entirnan, Rag Bilawal hi 'Bilaval that' ah chuan a hmasa ber niin, Hindi/Urdu tawng 'Rag' tihihi Sanskrit tawng, 'Raga' atanga lak chhuah a ni a. A awmzia ah chuan "lungrun tak" tihna a ni mai a. Tin, rag hi a ngaithlatu tana lungrun tak leh ngaihtuahna tihtohna chikhat ni a ngaih a ni bawk a ni - 'Bhilaval That' - Sa Ri Ga Ma Pa Dha Ni – C D E F G A B - hi Hindustani Musical Mode, western Ionian Mode (major scale) nena intluk/inang chiah a ni. Tin, a dang tamtak pawh hun rei tak ata tawh ziaka lo dah thlip thlep tawh an ni a. Hei lo pawh hi a dang han sawi tur tamtak a awm a ni.

Keini Mizote nunah pawh hian music (rimawi) hian sulhnu chhuitur a nei hnem khawp mai. A bikin, Pathian emaw mihring aia thilithei awma kan rin biaknan hla hi kan hmangin, heih hla lo chhuahna hmasa pawla ngaih a ni bawk. Mizo hla hmasa ah pawh, "Pi biakin lo chhang ang che, Pu biakan lo chhang ang che," tihihi a ni a. Tin, Mizo history han chhui letin, hla hian indona te pawh a lo thlen hial a ni tih a lan theih na chu, hmar lam Sailo lal Vuta khaw thar kaina turah Lalpuithanga, Chhim lam Zadeng lal chuan a lo kai khah a, mahse a awm hlen ngam loh avangin Chengteah a let leh a, Chu chu Vuta chuan, "Buan hmun paui ang pawm tawh hnu, Chengteah lam ang let e. Lalpuithang lema," tihihi

hla hmang hian a tihel ta a. Chhim leh hmar indona a lo chhuah phah ta a ni.

A dang leh ah chuan damna lampang atan pawh music hi hman a ni bawk. Greek mithiam Pythagoras-a, 570 BC vela mi chuan, "Music in mi a ti dam thei," tihihi thupui a hmangin taksa leh rilruna tihdamnan music a hmang nasa hle tih hriat a ni bawk a. Tin, music sawi dawn tak tak chuan, Johannes Chrysostomus Wolfgang Amadeus Mozart tihihi kaihruai thei bawk a. Austrian composer, 17th century hunlai ami hi hmah chi a nilo. Ani hian music 600 vel a phuah a, he a music phuah thenkhat atang hian French damdawi lam zirmi Dr. Alfred A. Tomatis chuan kum 1991 khan "MOZART EFFECT" tihihi hmuchhuak a. Hei hian Mozart-a music ngaihthlak atangin thluak lam tihdamna leh a tihchakna ah nasa takin kawngro a su tih a hmuchhuak a. Tin, Mozart Effect hi natna tihdamna leh thluak sawizawina atan khawvel hmun hrang hrangah hman niin, result tha tak a chhuah bawk a ni. (Hrechiang lehzual duh tan internet ah Mozart effect hi a zawn theih a ni).

Bible lam han thlir pawh music chu a hmasa pawlah tarlan a ni tho tho a. Genesis 4:21 ah chuan, "A nau hming chu Jubala a ni a: ani chu tingtang leh phênglawng tumtuho zawng zawng thlahtu a ni," tihihi ziak a ni a. Tin, Hebraite kha music ching chhuaku hmasa an ni a. Chubakak, Tui let khan music a titawp in a tirem lo tih a hriat theihna chu, Genesis 31:27 ah tho, Labana khan Jakoba hnenah, "Eng vângin nge arûka i tlân bo va, mi kal rûksan a, hlimna te nêñ, hla te nêñ, khuangtê te nêñ, tingtang te nêñ ka thlahna tûr chein mi hrilh loh va," a tihihi atang hian a ni. A Pathian thu leh Kohhran huang chhung atanga han chhut pawh hla tello chuan harhna te pawh hi a thleng mawh khawp mai. Tin, mitthi/khawhar inah pawh hla sa lova tlaivar hi kanla tichhin meuhlo in ka hria a. Tin, Pathian pawh hian music hi a ngaipawimawh a ni a rin nachhan chu, tunhma ata tawh hla hmanga Pathianin a pawl leh inhmuchhuak an tam tawh em avangin a ni.

Tunlai khawvel changkang zelah pawh han chhut ta ila, Lemchan (movie) ah pawh background music nei leh neilo hmuhnawm dan inkar chu hla tak a ni. Tin, zai chungchangah pawh, hla a hang a sak ringawt ai chuan a remna nena inchawhpawlhi hi a ngaihnawm bik a ni. Nula leh tlangval inlemla ah pawh music hian kawngro a su hnem hle tih hla tam tak atangin kan hre thei awm e. Mobile phone ringtone ah pawh music tello chu kan hmang tha duh meuh tawh lo a nihi. Chuvangin, music hi mihring nuna hmun pawimawh tak luahlu a ni avangin, a tangkai zawnga nun kaihruaitu ah I hmang zel ang u.

NEUVA

» An Secretary te YMA Gen.Conference kal pawh damtakin an lo haw leh ta.

» Naupang Silai lem khawlaia infiam nana hmang hmuh tur an awm leh ta a, intihpalh hlauhawm a nihangin nu leh pate kan fate leisak lo hram tura ngen kan ni e.

» YMA Zawlbuk Point-a Gas sem leh hunah Serial No. 40-94 inkar te inring tura hriattir kan ni.

» YMA Zawlbuk Fund la pe turt chuan Secretary hnenah la pek theih reng a ni e.

CHAWNGBAWLA

» Zawlbuk Fund khawn zaws thawkhat a ni tawh a, Branch a thehluh tawh zat chu 1,01,750/- a ni. Tlawmngaia petu zawng zawng chungah lawmthu an sawi.

» Khawlaiah Uí vak chhuak hmuh tur a tam leh ta hle mai a, Uí vulh tute mahni ui vulh te khuahkhirh tha leh zual turin an in chah.

» An Leader lo ni tawh thin Pu K.Lantanpuia Agriculture Extension Officer a a kaisang chu an lawmpui hle.

VANAPA

» Pi Lianzothangin chhiatni a hman tur chi tui bottle 12 lai mai a pe chu a chungah lawmthu an sawi takzet.

» Pu C.Zonunsanga (Zotea) 'T' leh Pu Zonunmawia 'V' ten chhiatni Signboard Information an ziasak a an lawm takzet a ni.

» Section atanga a conference kal te Pu Zarzokima S/o H.Biakchhungan chawhlui a lo buatsaihsaka an lawm takzet a ni.

» Section Picnic-na a kal tum ten tun tghla chhung ngein Secretary te hnenah Rs.50/- leh buhfai no 1 peh theuh tur a ni e.

» Hun remchang hmasa berah Section committee koh tum a ni a, hruaitute hunawl lo insiam theuh turin an in ngen.

TAITESENA

» Branch Committee in rem a tih chuan Ni 2.12.2011 hian Liando Picnic Spot-ah Section memberte pualin intihlimna hun hman tum a ni.

» He hun a kal tum te chu Section OB te hnenah Rs 20/- pe in hming ziah luh tur a ni ang. Hming pe lut lo te chu kal theih a ni loveng a, member 50 tal kan tlin loh chuan hruaitute bila he hun hi hman a ni ang.

(T-Section Report chhunzawmna)

» Section chhung Step Pu Lianzuala in bul atanga Khuangchera Section thenkhat rawng hnawih chu zaws fel a ni tawh a, veng mipuite dimdawih taka enkawl turin an in ngen.

» YMA Gen.Conference ah section aiawhin Secretary a kal.

KHUANGCHERA

» Gen.Conference ah an section atangin OB 3 leh member 3 an kal. Hlawhtling an inti in zawngchhangthlak an ti hle. An kalna atana motor thawhtu Leader leh Asst.Secy. te chungah lawmthu an sawi.

» Branch Committee in rem a tih chuan Ni 11.11.2011 hian West-End, Lengpui-ah Retreat neih tum a ni.

» Masihi Convention neih mek ah hruaitu zawng zawng an buaiin thlaraubo zawn kawngah thahnem an ngai tlang hle.

CWSC NEWS

» Ni 25.10.2011(Thawhleh) zan khan CWSC Executive meeting pawimawh tak neih a ni.

» Hun remchang hmasa berah Indoor Stadium kawt siama hnatiang pui neih tum a ni a, Sporting Club member zawng zawngte hunawl lo insiam hnatiang tum theuh turin an in ngen lawk.

» Aizawl District Football Association in District hrang hrang tana Under-16 Tournament a buatsaih turah kan veng atangin Aizawl District aiawh turin mi -3 heng Lalmawizuala 'K, Lalrinsanga 'T' leh Eric Zomuanpuia 'V' te an kal.CWSC chuan a chhuangin hlawhtlinna an chan ngei theih nan duhsakna a hlan.

Football Sub-Committee :-

» ADFA in 2nd Division Tournament naktuk (31.10.2011) atanga tan tur atan ngawrh taka inbuatsaih a ni.

» Thlather lo awm tur Ni 9 ah hian vengchhungah Sangha zawrh tum a ni a, vengchhung nu leh pa te tlawmngaia lo leisak theuh tum turin an ngen

Volleyball Sub-Committee :-

» Naktuk tlai Dar 4 atang hian Volleyball players zawng zawngte Indoor Stadium-ah Practice tan tur a ni a, tournament neih leh a nih dawn avangin thahnemngai theuh turin an in ngen.

66th YMA GENERAL CONFERENCE THUNAWI

» Conference Palai kal zingah hian (report dawn chinah) Pu Khuangringvunga (92) Kanan Br.(Aizawl) chu a upa ber a ni.

» Conference Palai te zingah Pu K.Malsawma (50) Maubuang Branch chu YMA General Conference vawi-29 (1982-2011) chatlak miah lova a kalna a ni.

» Conference thlengtu tanpuina sum lut zawng zawng hi Rs. 3,43,100/- a ni a, heng bakah hian ONGC atangin Rs.4,00,000/- hmuh a ni bawk.

» Tun dinhmunah Sub-Hqrs. 5, Group 46 leh Branch 783 an awm mek a, YMA member awm zawng zawng hi Mipa 2,20,518, Hmeichhia 1,50,026, Total 3,70,544 awmin, Life member 8581 an awm bawk a ni.

» Conference ah hian YMA hruaitu hlun mi 109 (mipa 100 leh hmeichhia 9) hnenah hruatu hlun chawimawina hlan a ni a, heng zingah hian Pu TC Lalchhawna chu kum 25 zet a zawnin hruaitu (OB) a lo ni tawh a, tin, Pu D.C.Doliana, Cherhlun chu kum 33 zet hruaitu (OB) a lo ni tawh bawk a ni.

» Kum 2012 a Conference thlengtu tur Kawrtethawveng hian Conference thlen tumin vawi 4 an dil tawh a, tun tumah hian chuhpuitu an awmlo a ni.

» Conference palai thleng hmasa ber chu Pu Laldanmawia, N.Vanlaiphai Branch a ni a, A ni hi October 10 khan he hun hmang tur liau liau hian Kolasib a lo thleng tawh a ni.

LUNGHLU ROAD WELFARE COMMITTEE

» Lunghlu Road Welfare Committee chuan kumin 2011 chhung hian hnatiang vawi-5 neih tawh a ni a. Vengchhung nu leh pa ten he kawng hmalakna hi min tawiawm that em em laiin, thenkhat he kawng area a awm ten duh angin min tawiawm tha tawk lo erawh hi Welfare Committee chuan pawi a ti hle a ni.

» He kawng (Lunghlu Road) hi tu ta bil mah a ni lova, kan zavaia kan ta ani tih i hre thar leh theuh ang u. Tin, he kawng tlang theih nana hmalak na hrang hrangah tun aia nasa a hnatiang thawkchhuak thin turin Welfare Committee a ngen mawlh mawlh a ni.

» He kawng kal theih nana phal taka ram petu zawng zawngte chungah Lunghlu Road Welfare Committee chuan lawmthu a sawi tak meuh meuh a ni e.

**MIZO HNAM DANA NUPUI PASAL
INNEIH DAN LEH A KALPHUNGTE**

pusum an tel thei a, chu chu 'Pu phir' an ti. Chu bak chu mantangah phir a awm ngai lo.

Palal - Khualkhuaa pasal nei chuan a va innghahna tur 'Thlen in' an tih thin atan hmelhriat tha leh bul deuh an zawng thin a, mi tupawh thisen zawnpui kher lo pawh an zawng thei. Chu chu 'Palal' an ti. Pasal nei khan duh duha chaw a lam ngamna tur a nih avangin 'Chawthing zenna' an ti bawk thin. A ni chuan nu leh pa biak hman loh thil a lo awmin pa chan a changa , pa hminga thil ti thei a ni.

Ni-ar - Ni-ar hi a pa farnu (a ni) ei tur a ni. Ni dik tak a awm loh pawhin a aiawh zawn chawp theih a ni. Hei pawh hi a duh leh phur nazawngin a lo ei ve ngawt chi a ni lo.

Naupuakpuan - Mo laizawn a u ei tur a ni. A nausen laia lo pawtu leh awmkleitu a nih avanga eitir thin a ni. U a neih loh pawhin zawn chawp theih a ni.

Thian man - Hmeichhiain pasal a neihin thian a nei thin a; mahse thian man hi a awm ngei tur a ni chuang lo.

Zawnchawp Pa leh zawnchawp Nuta - Nu leh pa nei tawh lovin pasal an neih dawnin Palal eitu ang mai nilo, pa-a vawn tur emaw, nuta-a vawn tur a zawn thei chungte chu 'Zawnchawp Pa leh zawnchawp Nuta' emaw an ni.

Nu Man - Nupa inthen tawh fanu emaw, nulat fain emaw pasal a neih chuan a nuin a man a ei ve thin hei hi Nu Man a ni a, man tang a nilo. a hringtu, a nu dik tak chauhvin a ei tur a ni.

Lawichal - Mo lawi tur hruaitu a ni a, hmanlai chuan mo lawi tur hi chirh ten an lo vawm thin a, chung huna mo chu a tluk loh nana hruaitu a ni. Hmeichhe lam nu leh pain an aiawha mi an ruat hi 'Lawichal' a ni. Khualkhuaa pasal neihna-ah pawh mawphurtu ber a ni. Mo chu a pasal turte ina tha tak leh him taka a lawi theih nana hruaitu pa chan chang a ni. Lawichal man hi mipa lamin an pe thin. Tualchhungah chuan Lawichal man hi pek ngei tur a ni chuang lo.

Tunlaia Lawichal kan hman dan hi chu fihamthu thawhna lam rawngkai mah mah hian a hriat a, kan pi leh pu te hunlaia a mawphurhna pawimawh zia ngaihtuah chuan tuna kan hman dan hi chu Mizo Culture

tihbawrhbanna lam a pawl mah mah. Lawichal hi fihamthu thawhna tur a ni lova, kan la hmang duh a nih chuan pangngai taka kan hman hi a tha hle. Lawichal chuan Mipa in-a a luh dawn hian, 'Kha fanu fapa kan rawn lawipui e' tiin hma hruaiin an au thin, chu chu a tih tur pawh a ni reng a ni, Lawichalin Sikret man, kuhva man etc. a phut vel hi chu thil tih chi a nilo hrim hrim. Chuvang chuan tupawh Lawichala tang chuan mo kha him taka a lawina tur a hruaithlen kha a tawk fihamthu rawngkai emaw uanthuanna lam rawng kaia thil harsa pui pui phut kha a tih tur a nilo.

Man lova innei - Nupui pasala inneih dawna man leh mual awmlo tura palai hmanga mipa chhungte leh hmaichhe chhungte inberema innei hi 'Man lova innei' a ni.

Man bo - Hmeichhia pasal nei tawh, sumchhuah emaw, uire emaw avanga inthen tawh hnuin, a lunglen vangin emaw, chhan dang vangin emaw man pawh phut lovin, nu leh pa remtihna pawh awm lovin a pasal inah lut leh ta sela, 'man bo' a ni. Nupa dik tak an ni leh a; amaherawhchu hmeichhung ten man an thing thei tawh lo. A bungraw chhawm erawhchu an chhuhsak thei a, an tuithlar thei a, an inremsiam leh thei bawk.

**KID'S DEN PRE SCHOOL, NURSERY DAY CARE
AND AFTER SCHOOL CARE**

January 2012 atanga tan turin Kid's Den-ah ni 1.11.2011 atangin Admission hawn tan a ni ang. Naupang PSYCHOLOGY, GROWTH and DEVELOPMENT trained chhuak, B.Sc Nursing in a enkawl dawn a, Teacher te pawh Trainee mek an ni. Thila inkar danah DENTAL leh MEDICAL checkup neisak ziah an ni bawk ang. Tin, After School Care - ah hian School Naupang Class I-VIII School banah Home Assignment leh Tuition munal tak (Parental Care) pek an ni ang. DAY CARE (Nau awmna) tih tel bawk a ni. Zawt chiang duh tan a hnuai Address-ah hian zawhfiah theih reng a ni e.

Ph - 8794026603

A Hmun : Chaltlang Venglai, D. Lalthlengiani Building
(2-6)

CHAM CHAM STORE
Chanmari West. Aizawl. C-85/01A

Ph. 9436352887 / 0389-2348162

Hengte hi kan ti thei e.

**Xerox, Lamination, Photo Block Lamination,
Passport Size, Spiral Binding, Invitation Card,
Visiting Card, Signboard, Baner designing etc.**

**Photo quality tha tak water proof
Camera, Mobile Phone etc. atangin kan print thei.**

